

INSAFLAH ... ! JIKA MAHU INSAF

Telah hampir dua tahun lamanya majalah Qalam mengunjungi pembaca-pembacanya boleh dikata tidak pernah kita menerima sesuatu rencana daripada alim ulama untuk memandu orang-orang awam tentang perjalanan dan hal ehwal yang berkait dengan agama Islam. Keadaan yang demikian ini mendukacitakan. Tetapi sungguhpun begitu setelah Qalam mendapat perhatian daripada pembaca-pembaca di Indonesia maka dengan tidak diminta rupa-rupanya ulama-ulama dari Indonesia yang memandang berkewajipan juga kepada saudara-saudaranya di Malaya dan dengan keikhlasannya telah menulis suatu rencana sebagai permulaan yang kita siarkan di bawah ini. Mudah-mudahan rencana ini menjadi panduan dan keinsafan kepada kita- Pengarang.

UMUR

(Oleh Kiyai Haji Abdul Samad, Jakarta)

Bagi sekian lamanya kita hidup di atas bumi Allah ini dia itulah "umur". Umur itu ada yang panjang dan ada yang pendek. Tiap-tiap manusia selalu bercita-cita ingin panjang umur. Sayangnya cita-cita itu tidak pernah sampai kerana batasan umur itu ada di tangan Allah. Walaubagaimanapun kaya dan tinggi pangkatnya seorang manusia jika telah sampai batas umur yang ditentukan Allah sekali-kali tak dapat memperpanjangkan umurnya. Oleh sebab itulah bagi manusia yang insaf akan hal ini tidaklah ia mahu mensiaikan umurnya mensesiakan umur itu ertiinya menggunakan waktu sehari demi sehari, sejumaat demi sejumaat, sebulan demi sebulan bahkan setahun demi setahun, inilah bagi hal-hal yang tidak ada gunanya, pada hal tiap-tiap nafas menjadi minit, dari minit menjadi jam dan seterusnya menjadi hari, bulan dan tahun semuanya menyebabkan kurangnya umur cadangan kita yang telah ditentukan Allah.

Tak banyak manusia yang insaf akan hal ini; dan tak banyak manusia yang tahu menghargai umurnya tetapi manusia yang tahu menghargai umur, manusia yang tahu menghargai masa maka dengan sedaya upaya ia menggunakan untuk dunianya dan (atau) akhiratnya. Sesial-sial orang itu kalau tak dapat menggunakan

umurnya untuk dunia atau akhirat maka umurnya itu digunakannya untuk tidur. Zahirnya orang tidur itu hanya membuang-buang umur juga tetapi jikalau tidur dengan anggaran, tidurnya dengan kira-kira maka tidur itu bagi manusia beroleh tenaga baharu. Rasalah misalnya jika pada siang hari kita bekerja keras untuk dunia dan akhirat kita maka pada waktu malam kira-kira pukul 4 subuh maka terasalah sihat dan segar badan kita. Manusia yang berumur 40 tahun ke atas cukuplah tidurnya tiap-tiap hari dengan enam jam. Makin tua umur kita, makin boleh kita mengurangkan jam untuk tidur, makin muda, makin banyak tidurnya. Kanak-kanak yang baharu zahir itu hingga 22 jam sehari semalam tidurnya.

Firman Allah: "Wal Asr inna insanna lafil khusr. Illa llazina amanu wa 'amilus solihati watawa sau bil haq watawa sau bil sabr." (maksudnya): Demi zaman, bahwasanya manusia itu selalu merugi hanya manusia yang beriman yang membuat pekerjaan yang baik-baik, yang berpesan-pesanan hal-hal yang benar dan berpesan-pesanan dengan sabar.

Allah bersumpah dengan zaman (Asar). Allah menerangkan bahwasanya manusia itu selalu merugi. Merugi ertiinya umurnya selalu berkurang akan tetapi tidak semuanya merugi –ada kecualinya. Yang terkecuali itu ialah (1) orang-orang yang beriman, (2) orang-orang yang berbuat perbuatan-perbuatan yang baik (amal salih), (3) orang-orang yang berpesanan tentang

kebenaran (hak) dan (4) orang-orang berpesan-pesan tentang sabar mensabarkan. Yang rugi itu ialah orang-orang yang selalu lajai dan lengah dan selalu lupa; baik lupa dalam maksiat, baik lupa tidak menunaikan kewajipan dunia atau pun kewajipan akhirat. Manusia yang dua macam inilah orang-orang yang sangat rugi hidupnya di dalam bumi Allah. Ia sudah lupa: (1) Dari mana saya? (2) Sekarang di mana saya? (3) Kemudian kelak hendak ke mana saya? Ia lupa saya datang dari mana; ia lupa daripada apa saya dijadikan; ia lupa bahawa sekarang ia ada di atas bumi Allah, bernaung di bawah langit Allah, makan dan minum rezeki kepunyaan Allah; ia lupa kerana apa ia dikirim Allah ke dalam dunia ini. Firman Allah: "wa ma khalaqatu al-jin wa al-ins illa liya'budun" Maksudnya: Tidaklah Kami jadikan jin dan manusia itu melainkan untuk menyembah Kami.

Jikalau manusia tak suka menyembah Allah, tidak mengapa; Allah pun tidak akan kesukaran kerana itu. Akan tetapi ingat – jangan tinggal di atas bumi-Nya; jangan makan dan minum rezeki-Nya; jangan bernafas dengan udara kepunyaannya-Nya. Jikalau manusia menggunakan sekaliannya itu untuk hidupnya, sudah tentu wajib pula atasnya menunaikan perintah-perintah-Nya dan menjauhkan diri daripada apa yang ditegah-Nya. Itulah sebabnya jikalau manusia itu, berbuat sekehendak hatinya sahaja di atas bumi Allah ini maka memang telah selayaknya ia dihukum dengan hukuman yang seberat-beratnya daripada dunia ini hingga sesudah matinya.

Oh manusia! Oh mereka yang lupa daratan! Mereka yang tidak tahu diri! Semenjak bilakah tuan telah lupa kepada Khaliq al-'Alam? Dan sampai bilakah tuan insaf akan diri tuan?

Tidak ada seorang pun di dalam dunia ini yang tak ingin hidup berbahagia dan kemudiannya (sesudah mati) ingin pula berbahagia. Akan tetapi kebanyakan manusia itu salahnya tidak suka mengikut jalan yang akan membawanya ke tempat kebahagiaan dunia – akhirat itu. Mereka merasa lebih bijak dan lebih pandai daripada Allah yang mempunyai semesta alam ini.

Allah telah menerangkan dengan nyata jalan mana dan jalan apakah yang harus ditempuh orang supaya orang itu mendapat bahagia dunia dan akhirat sebagaimana berikut: (1) beriman, (2) beramal salih, (3) berpesan dalam perkara yang hak dan (4) berpesan dalam hal sabar mensabarkan.

(1) Beriman – sudahkah tiap-tiap orang beriman?

Jikalau sudah adakah imannya yang jati atau iman sepuh sahaja? Iman itu letaknya tidak di bibir dan tidak di lidah. Iman itu letaknya di hati. Tak ada manusia yang mengetahuinya – hanya kita sendiri dan Allah Subhanahu Taala yang Maha Berilmu itu. Yang dapat diketahui orang lain hanyalah apa yang melimpah daripada hati tiap-tiap orang. Orang yang sebenar-benarnya beriman itu nescaya tidak ia akan mengerjakan pekerjaan-pekerjaan yang ditegah, baik tegahan agama atau pun tegahan negara. Dalam pada itu jikalau orang telah menjauhkan diri daripada barang yang ditegah oleh agama maka dengan sendirinya ia menjauhi barang yang ditegah oleh negara – kerana tegahan negara itu biasanya terlindung di bawah tegahan agama bahkan orang yang sebenar-benarnya beriman dengan yang jati nescaya terpelihara lidahnya, anggotanya dan hatinya daripada apa-apa yang ditegah. Sekiranya seseorang masih gemar mengerjakan pekerjaan-pekerjaan yang ditegah maka itu tandanya kurang imannya.

(2) Beramal salih – cuba tanya kepada diri

sendiri. Amal salih apakah yang telah saudara kerjakan? Kebaikan apa yang telah saudara perbuat untuk Allah yang mempunyai alam ini? Kebaikan apa yang telah saudara perbuat untuk sesama manusia? Cuba saudara jawab dengan jujur dengan benar dan dengan tidak membohongkan diri sendiri – jangan cuba membohong kepada Allah Tuhan yang sangat Mengetahui itu. Habai-habai jikalau saudara belum membuat kebaikan kepada Allah dan manusia, buatlah dari sekarang – jangan tunggu esok atau lusa. Umur kita di tangan Allah – entah sekarang, entah esok kita dipanggil pulang – pulang yang tak akan balik-balik lagi. Supaya saudara nanti tidak akan menyesal diri dengan tidak berkesudahan persilakanlah membuat kebaikan sekarang juga – jangan

bertangguh lagi.

Saudara tentu akan bertanya bagaimana

saya akan membuat kebaikan? Jawabnya

apa sahaja yang saudara perbuat yang

isinya menunaikan perintah-perintah Allah; apa jua

yang saudara perbuat untuk kebajikan

sesama manusia. Kebaikan yang sesuai

dengan hukum-hukum Allah ia itulah kebaikan.

Sebaliknya apa jua yang dilarang oleh syarak

ia itulah lawan kebaikan ertiinya

kejahatan.

(3) Benar- tidak ada satu sifat

yang sebaik dengan sifat benar; benar

di lidah, benar di hati. Rasul-rasul dan

Nabi-nabi bahkan sekalian orang yang salih semuanya dihiasi

Allah dengan sifat benar. Sahabat dan mertua Nabi yang sangat

utama di antara sekalian manusia ialah Abu Bakar yang benar.

Sekalipun orang yang kafir kalau ia bersifat benar ia

akan mendapat kemuliaan. Orang Islam yang benar (hak) akan

mendapat kemuliaan itu semenjak dari hidupnya hingga

kematian. Oleh sebab itu pohonlah kepada Allah supaya

kita dihiasi dengan sifat benar. Dengan benar itulah

orang selamat hidup di dunia. Dengan benarliah orang lepas

daripada seksa; dan dengan benarliah orang baharu boleh

memasuki syurga.

(4) Sabar mensabarkan – tidak ada perbuatan yang

baik-baik dihadapkan kepada Allah dan sesama manusia mesti

mengandung kesukaran tidaklah nanti seorang dapat menunaikan

kebaikan itu sekiranya ia tidak bersifat sabar. Sabar

menunaikan kebaikan itu sekalipun bagaimana jua

sukunya. Nabi-nabi dan Rasul-rasul penuh diliputi oleh

berbagai-bagi kesukaran tatkala menunaikan kewajipan

yang dikurniakan Allah atas dirinya – tidak seorang jua

pun daripada mereka itu yang undur dalam masa menunaikan

kewajipannya itu – lebih lagi Nabi Muhammad (SAW) yang telah



Siti Nur Jannah seorang pensyarah kaum ibu yang terkenal sedang memberi ucapan dalam perjumpaan Maulid Nabawi Syarif yang telah diadakan di Tanah Lapang Ikada Jakarta baharu-baharu ini. -Gambar Airpost.

menerima kesukaran menjalankan kewajipannya.

Nabi kita tidak pernah putus asa, tak pernah undur menjalankan kewajipannya. Penderitaan yang pahit-pahit tatkala menunaikan kewajipan inilah yang mesti ditahan dengan sabar. Sekarang nyata bukan sahaja kita diperintah sabar akan tetapi wajib pula sabar mensabarkan kepada sesama manusia.

Empat macam pangkal inilah, iaitu beriman, beramal salih, benar dan mensabarkan, jalan ke pulau bahagia yang telah diterangkan oleh Allah di dalam kitabnya yang mulia. Sesiapa ingin hidup berbahagia, hati berbahagia malah menerima bahagia yang tidak habis-habisnya hendaklah ia melalui jalan yang tersebut. Jalan inilah jalan yang selamat, jalan yang telah ditempuh oleh Rasul-rasul dan Nabi-nabi dan oleh orang-orang yang tahu akan dirinya, siapa saya dan dari mana saya.

Itulah sebabnya mereka itu dalam masa hidupnya berbahagia dan pada masa ini beristirehat di sisi Tuhan mereka dengan berbahagia dengan apa yang telah dilakukannya semasa mereka itu ada di atas bumi Allah ini. Mudah-mudahan Allah mengurniakan kita dapat mengikut jejak orang-orang besar itu dengan diberinya kurnia terbuka pintu berbagai-bagi kebajikan dan ditutupnya pintu kejahanan

(sambungan daripada muka 10)

membawa kepada runtuh sama sekali rukun-rukun Islam perkara semacam ini, ada termaklum di sisi kebanyakan manusia sehingga orang-orang bukan Islam pun mengetahui. Segala tanda-tandanya ada banyak, maka di sini saya nyatakan hanya satu sahaja daripada tanda-tanda itu, kerana takut jadi panjang dan meleret jawapan saya ini.

Sesungguhnya Mr Lawarrance Browne (Lawarrance Browne) ada menyebutkan di dalam kitabnya yang bernama (The Prospects Islam) yang menunjukkan sebenar-benarnya orang-orang Islam meninggalkan agama mereka demikian ringkasannya katanya: Manakala telah kita batalkan undang-undang Islam berkenaan jinayat dan madani (sivil) di India kerana kita ketahui undang-undang itu rujuknya kepada zaman yang telah lapuk tidak berguna pada masa ini dan kita kekalkan undang-undang sahsiah (Personal Law) sahaja. Hal ini seolah-olah telah menyentuh agama orang Islam dan menyakitkan hati mereka itu kerana hal yang demikian itu adalah menjadikan taraf kedudukan orang-orang Islam seakan-akan taraf kedudukan ahli-ahli zimmi, (kafir zimmi di negeri Islam) semenjak beberapa beberapa abad dahulu. Tetapi udara telah bertukar, keadaan telah berubah bukan sahaja orang-orang di India yang telah redha dengan batal undang-undang itu bahkan telah menjangkit ke seluruh kerajaan-kerajaan Islam yang lain mengikut jejak langkah ini, seperti kerajaan Turki dan Albania telah memasukkan pindaan yang baik ke dalam undang-undang nikah kahwin dan pusaka, yang menjadikan undang-undang kerajaan itu mencapai darjah undang-undang kita ada menyainginya, dengan yang demikian ini terbukalah tembelang hakikat yang diangkarakan oleh orang-orang Islam beberapa lamanya, iaitu dahulunya orang-orang Islam mengiktikadkan syariat agama Islam itu diambil daripada wahyu Tuhan, iaitu kitab Quran yang diturunkan dari langit, pada hal hakikat yang sebenarnya hanya cerita karut, dan karangan-karangannya yang disucikan (Flos Fiction) demikianlah perkataan Mr Lawarrance Browne lebih kurang maknanya.

Kekesalan dan tempelak adalah semuanya tertumpu kepada

orang-orang Islam yang membukakan kepadanya jalan, dan memberi batu serta sumpah-sumpah kekotoran supaya merejam agama Islam dengannya. Orang-orang yang menolongnya berbuat demikian itu ialah orang mulhid kafir zindik yang tersergam duduk di atas kerusi-kerusi jawatan yang besar-besar, menerima gaji yang banyak mengambil peluang menghapuskan agama Islam.

Saya katakana tidak ada hari ini suatu undang-undang di atas muka bumi yang menyamai atau dekat dengan keadilan-keadilan hukum-hukum Islam. Bersih daripada tujuan-tujuan dan hawa nafsu yang jahat, hukum-hukum Islam telah pernah dijalankan dalam negeri-negeri yang berkemajuan, mengenai segala peringkat dan golongan manusia, dapat mengamankan penduduk-penduduk dan memakmurkan negeri-negeri aman sentosa dan damai, terjauh daripada jemaah-jemaah dan mazhab-mazhab yang mengganas-ganas, meruntuh keamanan, mengganggu kesenangan membuat huru-hara sehingga bangkit pergaduhan dan perperangan yang membinasakan isi dunia. Ini telah disebutkan oleh Rasulullah Salallahu Alaihi Wasalam. Hatta dalam Injil Bernaba ada disebutkan.

Pada hari ini, kita mengharap-harap supaya kerajaan Islam dan kerajaan yang bukan Islam membiarkan kita dengan undang-undang sahsiah kita jangan dihalang-halang, jangan ditukar dan dirombak, tetapi harapan kita sangat tipis dan terlambat, kerana kerajaan-kerajaan Republik Islam dialah yang mula-mula meruntuhkan tiang-tiang hukum sahsiah Islam, kemudian ditiru pula oleh setengah kerajaan Islam, bahkan kita nampak kerajaan-kerajaan itu telah mengambil fadhlul pulu hendak meruntuhkan Islam berkenaan hukum sahsiah, iaitu saki baki yang ada tertinggal di dalam tangan orang-orang Islam. Bahkan ahli-ahli agama dan ilmu pengetahuan berpendapat bahawa kerajaan-kerajaan Republik Islam yang membuang tulisan Quran dan tulisan umat Islam adalah bertujuan hendak menghapuskan agama Islam, dan tidak hendak mengakui agama Islam agama rasmi kerajaan bahkan telah menetapkan kerajaan tidak beragama.

Orang-orang Islam yang berdiri mempertahankan agama Islam yang daif pada serba serbi, mereka itu seolah-olah mayat di atas papan mandi, digolekkan oleh orang yang memandikannya

menurut sekehendak hati-hatinya tidak ada kedengaran suara daripada mereka itu, sekalipun berseru bermohon supaya jangan diganggu agama mereka, betapa lagi membangkangnya jauh sekali, memang mereka tidak berdaya membuka mulut tetapi yang sebenarnya setengah kerajaan Islam yang mengaku agama rasminya Islam, dialah yang lebih menceroboh ke atas hukum-hukum Islam sahsiah dan lain-lainnya, maka diambilnya daripada orang-orang yang mengaku ulama, bahkan orang-orang yang memakan rasuah dan haram, menjualkan agama dengan sumpah-sumpah dunia, memesongkan nas-nas Al-Quran, dari yang demikian itu tidaklah pelik jika diturunkan bala ke atas orang-orang Islam dan kerajaan Islam.

Tuan penyoal tidak menyalin mudhuk asykal-nya daripada makalah yang bertajuk "Hak dan Kebebasan Perempuan" kesemuanya hanya mencabut daripada makalah itu demikian bunyinya "faham tentang kuasa wali mujbir itu berjalan di dalam mazhab Imam Syafie sahaja."

Perenggan kata "Hak dan Kebebasan Perempuan" sebelum saya menjawabnya say gioialah diketahui adakah penulis makalah itu membina perkataannya pada hak-hak perempuan dan kebebasannya di atas kaedah agama Islam? Atau dibinanya atas kaedah kemajuan fasik yang hampir-hampir meliputi seluruh dunia hari ini? Yang tidak pernah terjadi semenjak dahulunya iaitu bidaah dalam agama-agama lain daripada Islam, dan adat kemanusiaan zaman dahulu, kemudian mendakwa Islam setuju dengannya, inilah dianya hakikat kufur yang tiada disangkal lagi.

Tujuan penulis makalah itu tidak terang, kerana tuan penyoal tidak menyebutkan kesemuanya, maka terpaksalah kita tangguhkan jawabnya, sehingga kita ketahui adakah yang mengatakannya itu daripada penulis itu sendiri, ataupun disalinnya daripada orang lain? Atau didapatnya daripada perkataan puak Batiniyyah yang mereka itu memang keluar daripada agama Islam, yang lebih cergas menyiarkan mazhab mereka ialah puak Babiyah, Qadyaniyah, dan Ismailiah. Mazhab mereka itu adalah campuran daripada ramuan akidah Disaniah, Majusiah, Dahriah, Sa'ibah, dan lain-lainnya daripada puak-puak kafir. Gerakan mereka itu adalah terdiri di atas

dasar dajal dan zahir pada tiap-tiap zaman dengan mengikut keadaan masa. Dalam kurun Islam yang ketiga dan kemudiannya mereka itu zahir bermazhab syiah, kemudian apabila tersiar tasawwuf di alam Islam, mereka campurkan tasawwuf dengan membuat satu kaedah atau tariqat yang membawa kepada kafir, di Timur. Jauh mereka itu menarik orang-orang Islam kembali kepada agama Buddha, mereka itu berselimut dan bertopengkan Islam. Dari sebab yang demikian itu telah terjadi perperangan yang hebat di Sumatera di antara orang Islam dengan orang yang murtad balik kepada menyembah berhala perempuan yang dinamakan (Perpatih) dan diterjemahkan oleh setengah penulis (Browati) berhala ini ada di (Khajoor) dalam negeri India dan dengan sebab yang demikian itu juga telah terjadi perperangan yang berlanjutan di antara orang-orang Islam yang sebenar dengan orang-orang yang zahirnya Islam. Setengah daripada Raja mereka itu telah membunuh dalam 4,000 ulama Islam berserta anak bini mereka setelah dikumpulkan dalam satu tempat kurungan, barangsiapa hendak meluaskan pengetahuannya dalam perkara ini bolehlah ia rujuk kepada tawarikh Islam di Timur Jauh.

Adapun tujuan saya membawa tuan kepada yang tersebut di atas, ialah kerana saya dapat seakan-akan serupa dengan yang disalin oleh tuan penyoal pada setengah makalah-makalah Qadyani dan penyeru-penyeru yang berselimut dan bertopeng agama Islam, dan setengah orang yang bertopengkan Islam, iaitu orang-orang yang menyembah berhala Majusi hendak yang mahsyur namanya (Sewa atau Shewa atau Siswa).

KEBEBAAN PEREMPUAN

Tuan-tuan agaknya kerap kali terpandang makalah-makalah yang sibuk penulis-penulisnya dengan kebebasan perempuan dan kahwin paksa. Mereka itu kebanyakannya daripada orang-orang yang jahil berkenaan hukum-hukum Islam, dan makna kebebasan dalam Islam. Mereka itu sebenarnya menyeru kepada hukum-hukum syaitan, hawa nafsu dan kebebasan fasik, mencabul kesopanan perempuan, merogol kehormatannya, menghapuskan maruah anak-anak dara,

mendesak mereka itu menuju medan fasik, menyerahkan diri mereka kepada pemandu-pemandu (barua) yang termaklum pada zaman ini memakai nama pengeluar hamba putih memperniagakan anak-anak dara itu seperti intan permata, dijual kepada siapa-siapa yang suka membelinya dengan tidak memilih fasik atau kafirnya dan sebagainya. Anak-anak dara dan perempuan-perempuan itu telah dimonopoli oleh pengeluar-pengeluar dengan surat-surat perjanjian hutang dan sebagainya, yang ditaksir daripada makan minum tempat dan pakaian gadis-gadis, yang terutama pada alat perhiasan dan pesolek, sehingga pemudi-pemudi itu terikat tidak dapat melepaskan diri daripada kehambaan pemandu hanya taat menurut perintah menerima lelaki memuaskan hawa nafsu. Hal cerita yang semacam ini banyak didapati di dalam kitab-kitab berkenaan Raqiq Abid, atau hamba putih. Inilah satu daripada tujuan penyeru-penyeru kebebasan perempuan.

Dan lagi tujuan mereka itu supaya perempuan-perempuan dapat peluang keluar merayap-rayap sepanjang jalan dan di serata pasar, memenuhi taman-taman hiburan, pentas-pentas, panggung-panggung, kedai-kedai minuman keras, kedai-kedai kopi, tempat-tempat menari dancing, bergesel-gesel, beradu kecantikan di hotel-hotel di rumah-rumah gelap dan lain-lain yang diketahui oleh tiap-tiap orang pada masa ini yang telah am meliputi seluruh dunia, hal semacam ini tidak pernah terjadi di zaman dahulu, tetapi berlakunya setelah tamadun Barat menakluk tamadun Timur hingga hari ini. Dahulu orang-orang Timur bersih diri, suci darah keturunan, hormat kepada perempuan-perempuan menjaga maruah mereka itu supaya jangan terjadi seperti jamban pasar bergilir-gilir laki-laki masuk membuang hawanya, sehingga apabila telah habis kesihatan perempuan oleh sebab tidak berhenti menerima dif-dif yang bermacam-macam itu siang dan malam sehingga ia letih lesu pada ketika itu iapun tercampak, tidak ada orang yang menolongnya, tidak ada bapa atau ibu kaum keluarga hingga maut kelaparan, atau mengidap penyakit batuk kering dan sebagainya, akhirnya tercampak di rumah-rumah miskin atau di rumah-rumah sakit. Inilah akhirnya kebebasan perempuan yang diserukan.

Bagi ahli-ahli penyeru itu ada pula tujuan lain dari padanya itu seperti jadi pemandu. Adapun erti pemandu yakni jadi perantaraan di antara laki-laki pelacur dan

perempuan sundal dengan mendapat upah kerana ia menjadi guide. Ini pada ketika belum ada kedai-kedai berlesen dan belum ada kebebasan perempuan berzina dengan terang-terang. Adapun guide zaman sekarang lain macam bukan seperti dahulu iaitu dengan mengeluarkan bermacam-macam majalah yang penuh dengan gambar-gambar yang menggoncang iman, meletupkan syahwat dan menarik kepada berlumba-lumba menuju medan fasik. Majalah-majalah itu penuh dengan cerita-cerita lucu dan gambar-gambar telanjang bogel, yang mudaratnya lebih daripada cara dahulu.

Hendaklah tuan ingat manusia itu kadang-kadang ada mengidap penyakit ingin kepada tiap-tiap baharu setiap hari suka bertukar kepada benda-benda baharu daripada satu pemudi kepada satu pemudi, memuaskan nafsunya dengan jalan fasik dan terkadang penyakit itu kuat menakluk manusia sehingga boleh jadi orang setengah tiang. Apabila ia melihat perempuan-perempuan berdinding daripada laki-laki, atau tidak membenarkan bebas bercampur gaul yang diharamkan maka ia pun berteriak-teriak dan menjerit-jerit mengatakan perempuan teraniaya, tidak ada mendapat hak-hak kebebasan, keadilan dan hak-hak persamaan, mengeluarkan kata-kata yang tidak munasabah dan gerak geri sepak terjang yang hebat mengenai agama Islam dan ulama Islam.

Alwi bin Tahir Al-Haddad

Mufti Kerajaan Johor.

Sekianlah fatwa Sahib Al-Fadhilah Tuan Al-Syed Alwi bin Tahir Al-Haddad Mufti Kerajaan Johor dengan kita tidak menambah walau sepatah pun. Kita hanya meminta timbangan dan perhatian daripada pembaca-pembaca tentang jawab yang diberi iaitu adakah kena soal itu dengan jawabnya? Adakah sesuai pertanyaan dengan masalah akhbar dijawab umpama dengan perkataan-perkataan "dahulu orang-orang Timur bersih diri, suci darah keturunan, hormat kepada perempuan-perempuan, menjaga maruah mereka itu supaya jangan terjadi seperti jamban pasir bergilir-gilir lelaki masuk membuang hawanya Sesungguhnya kita berasa malu dan duka cita mendengar suatu jawapan yang sebegitu dikeluarkan oleh seorang mufti di atas soal masalah yang dicari kebenaran dan hak di atasnya.

Sekiranya pembaca-pembaca menatap di dalam pendahuluan rencana

“Hak dan kebebasan perempuan” di dalam Qalam bilangan 4 bulan September 1950 tentu pembaca-pembaca telah menatap bahawa kita membebaskan ia menulis rencana yang bertujuan menuntut hak-hak dan kebebasan perempuan di dalam Islam yang bersandar faham-fahamnya kepada Al-Quran dan Al-Hadis yakni dengan membebaskan bahawa ia memberi fikiran dan pendapatannya sebagai seorang perempuan menuntut kebebasan-kebebasan perempuan di dalam Islam sebagaimana yang diberi kepada mereka terutamanya di dalam hal perkahwinan oleh sebab banyak perkara-perkara anjaya yang telah terjadi kepada mereka; harus pendapatannya itu mencontoh kepada sandaran hadis (maksudnya) Buraidah telah berkata telah datang seorang perempuan kepada Rasulullah (SAW) lalu berkata: Sesungguhnya bapa saya telah kahwinkan saya kepada anak saudaranya supaya terhapus kehinaan dengan sebab saya maka Rasulullah (SAW) menyerahkan perkara itu kepada kemahuannya sendiri. Anak perempuan itu berkata: “Saya benarkan apa yang telah diperbuat oleh bapa saya tetapi saya hendak beritahu kepada perempuan-perempuan bahawa bapa-bapa itu tidak mempunyai kekuasaan” – Hadis sahih riwayat Ibnu Majjah Ahmad dan Nasai.

Selain daripada itu jika pembaca-pembaca memerhati bahawa tidak ada walau sepatah pun di dalam tulisan di bawah tajuk “Hak dan Kebebasan Perempuan” itu ada menunjukkan tuntutan-tuntutan sebagaimana yang digambarkan oleh jawab mufti kepada soal itu kerana daripada majalah Qalam bilangan 4 hingga yang akhir adalah penulisnya dari satu ke suatu masa membentangkan tuntutan-tuntutan hak yang diberi oleh Rasul Allah (SAW) kepada mereka dan jauh sekali daripada menyeru orang kepada “persundulan, memuaskan hawa nafsu dengan secara kebinatangan” bahkan ia menunjukkan dan menyeru orang supaya balik kepada jalan yang diberi oleh Rasulullah (SAW) dengan berpandu kepada Al-Quran dan Al-Hadis dengan tidak mahu menyembunyikan walau sedikit pun kepada pengetahuan orang ramai kerana ia berpendapat bahawa agama Islam itu bukannya agama Yahudi dan Nasrani di dalam mana orang ramai dipaksa atau didesak hanya mengikut apa yang dikatakan oleh ulamanya sahaja.

Sesungguhnya cara jawapan fatwa yang diberi oleh seorang mufti daripada sebuah Jabatan Agama yang terkemuka dan tertinggi di seluruh Tanah Melayu sedemikian itu keadaannya mendukacitakan dan harus nanti dengan sebab itu pandangan yang sebegini tinggi akan turun ke bawah dengan sebab kecuaian-kecuaian kakitangannya terutamanya dilakukan oleh seorang mufti. Kita berharap mudah-mudahan hal ini diperhati oleh yang di-Pertua Jabatan Agama yang mashul dalam perkara ini supaya dalam masa-masa yang akan datang tidaklah fatwa-fatwa itu dikeluarkan lain ditanya lain dijawab – lain sakit lain diubat kerana yang demikian itu bukannya menyelesaikan barang yang kusut bahkan semakin menambah kusut lagi.

Di sini kita patut mengesyorkan bahkan juga patut memberi pandangan mudah-mudahan mendapat perhatian bahawa hendaknya apabila datang sesuatu pertanyaan di atas sesuatu masalah jawablah sahaja pertanyaan atas masalah itu sahaja dengan disandarkan kepada Al-Quran dan Al-Hadis dengan tidak memberi pendapat atau fikiran apalagi memberi berasaskan kerana yang demikian itu menyalahi daripada kebiasaan. Sekiranya ada rasanya terbit suatu “geram” hendak melepaskan sesuatu janganlah hendaknya diletakkan di dalam fatwa – Tulislah rencana kerananya dan sekiranya majalah Jabatan Agama Johor tidak mahu menyiarannya silalah hantar kepada Qalam insya-Allah Qalam sedia menyiarannya tetapi dengan syarat tidak cara celupar.

Kita yakin kalau keterangan-keterangan yang diberi dengan cara yang berperaturan dan mengikut “agama itu nasihat” maka kita percaya bahawa orang akan sedia rujuk kepada kebenaran jika keterangan-keterangan yang diberi cukup memuaskan hati. Mudah-mudahan apa yang kita tulis menjadi suatu peringatan yang tulus ikhlas dan menjadi seperkara yang tidak dipandang menegakkan benang basah tetapi hanya bertukar-tukar fikiran dan faham dan jauh sekali daripada kita melayan kepada lengkok dan tari yang telah dijawab oleh mufti itu kepada masalah yang ada keayat berat dengan makalah yang telah tersiar di dalam majalah kita. Sekianlah dahulu adanya – Pengarang.